

SURAT PAULOS KE JEMAT

EPISOS

PENULAU BECAKAP

Surat to' datules rasol Paulos ke jemat Kristen te de Episos, pas tangan ya dapenyara. Semaru alam surat to' depadah Tuhan Allah mileh urang te daempu Ya. Depadah Isa Al Maseh ngampon aba' ngelepas urang ari dusa, aba' depadah Tuhan Allah nanyi Roh Kudus ngau kelai' ente' urang pecaya' jadi empu Ya.

Te kedua depadah isa' kebala urang pecaya' te maca surat to' tau' idop sati alam Isa. Bukti ente' jemat nyau sute' alam Isa Al Maseh, Paulos nyema' ente' jemat to' kebarat tuboh, Isa to' kebarat pala'. Jemat kebarat ke bini, Isa to' kebarat ke laki. Paulos ma mah ampal ngingat pemayek ati Tuhan Allah aba' apa te dapulah Isa Al Maseh isa' kita daslamat; keba' klala amat mah alam surat to' Paulos ma mah besukor aba' muji Tuhan Allah.

Tabe' ke jemat de Episos

1 Tabe' ari ku Paulos. Surat to' ku tules ke kebala urang Episos te setia te daempu Tuhan Allah. Ku to' rasol Isa Al Maseh. Ku jadi rasol nuna' peneka' Tuhan Allah.* ²Ku bradua ke kita' isa' Tuhan Allah Apai kita aba' Tuhan Isa Al Maseh nganya' pemayek ati aba' mre' idop penoh damai.

Kebala berkat rohani te dabre' Tuhan Allah

³Puji Tuhan Allah. Ya mah Allah aba' Apai Tuhan kita Isa Al Maseh te udah mre' ke kita kebala berkat rohani ari sruga nema kita udah sute' aba' Al Maseh. ⁴Sebedau dunia to' dapulah, Tuhan Allah udah mileh kita ngau anak Ya ngau cara nyute' kita aba' Al Maseh, isa' kita jadi kebala urang te

* 1:1 Kis. 18:19-21; 19:1

suci aba' idop nise' penyalah de mua Ya. ⁵Tegal Ya kaseh ke kita, keba' ari semaru Tuhan Allah udah ngamo' ngeliger kita ngau anak Ya. Uga' nya' udah tejadi nema apa te dapulah Isa Al Maseh. Nya' mah kedeka' Tuhan Allah, nema nya' te degaga Ya. ⁶Kita patot muji Tuhan Allah nema Ya udah nganya' pemayek ati mileh kita ngau anak Ya. To' Ya pulah nema Isa Al Maseh, Anak te ma Ya kaseh. ⁷Tuhan Allah ma mah bayek ke kita. Nya' nyuroh Ya nebos kita ngau darah Anak Ya de kayu saleb aba' ngampon kita ari kebala dusa. ⁸Ya mulah piya' nema Ya ma mah kaseh ke kita, aba' Ya udah mre' ke kita brena macam pemanai. ⁹Tuhan Allah udah nganya' ke kita apa te udah deamo' Ya nema nya' te degaga Ya. Meliya' teh te deamo' Ya detapok Ya ari urang. Ento' Ya udah mutos nya' ka' datemo' Al Maseh ¹⁰nuna' senta te udah deatoh Ya. Pengamo' Ya nya', uga' utai te adai de sruga aba' de bumi to' jadi sute' daprintah Al Maseh.

¹¹Tuhan Allah mulah uga' utai nuna' peneka' Ya kedire' aba' nuna' te deamo' Ya. Ari semaru Ya udah mileh kita jadi urang te daempu Ya ngau cara nyute' kita aba' Isa. ¹²Isa' kami te blaboh ari semaru ngarap Al Maseh, nunyong tinge' Tuhan Allah nema lampar besai kuasa Ya. ¹³Upa piya' mah ga' kita'. Kita' udah sute' aba' Isa, breta kita' ninga Brita Bayek ari Tuhan Allah te nyelamat kita'. Breta kita' pecaya' ke Brita nya', Tuhan Allah udah mre' Roh Kudus te udah dedanyi Ya. Roh Kudus nya' ngau kelai' ente' kita' to' empu Ya. ¹⁴Roh Kudus te adai de kita, nya' mah te nyuroh kita yaken jemah lah Tuhan Allah pesti bamat-amat ngelepas kita te jadi umat Ya aba' mre' apa te udah dedanyi Ya ke kita. Keba' nya' boh kita muji Tuhan Allah te lampar besai kuasa.

Pradua Paulos ke jemat Episos

¹⁵Keba' nya', breta ku ninga rita iman kita' ke Tuhan Isa aba' kaseh kita' ke uga' urang daempu Tuhan Allah, ¹⁶ku nise' pemado' besukor ke Tuhan Allah. Aba' ku slareh ingat bradua ke kita'. ¹⁷Ku slareh bradua ke Apai te lampar besai kuasa, Allah Tuhan kita Isa Al Maseh. Ku bradua isa' Ya mre' Roh Kudus te ka' madah pengamat tentang Allah aba' nulong kita' nglala Ya lebeh bayek. ¹⁸Aba' ku bradua isa' Tuhan Allah nyuroh kita' nyarok aba' yaken ke uga' utai te bayek te udah deageh Ya ke kita' jalai Ya gumai kita' pecaya' ke Ya. Kita' alah nyarok ga', luar biasa uga' utai te bayek te udah Tuhan Allah danyi ke kebala urang te daempu Ya. ¹⁹Aba' ku bradua isa' kita' nyarok lampar besai kuasa te dengau Tuhan

Allah nalau kita urang te pecaya'. Kuasa Tuhan Allah nya' lampar besai sama upa meda' ²⁰te dengau Ya ngidop Al Maseh ari pemat i aba' nyuroh Isa dudok de sepiyak kanan Ya de sruga. ²¹De sruga Al Maseh mrintah ngau kuasa te jaoh lebeh besai ari brena macam jenis roh te mrintah aba' kebala te bekuasa. Al Maseh bekuasa nadai pro' de jaman to' uleh jemah ga' lah. ²²Aba' Tuhan Allah udah nepo' uga' utai debaroh kuasa Isa, aba' ngangkat Isa jadi pala' jemat, jadi pala' uga' kebala utai. ²³Jemat to' tuboh Isa Al Maseh aba' uga' te adai de Ya dabre' ke jemat. Ya adai de bumi aba' de sruga, adai diya'-dito'.

Urang daslambat tegal pemayek ati Tuhan Allah

2 Meliya' teh kita' udah mati rohani nema kita' dusa aba' ngelawan printah Tuhan Allah. ²Kita' idop nuna' kebala utai te dapulah urang dunia aba' nuna' peneka' Ibles Kepala' bala sitan te adai de udara, ya te tangan bekuasa alam pengidop uga' urang te nadai patoh ke Tuhan Allah. ³Meliya' teh uga' kita sige' sama mah upa sida', kita idop nuna' peneka' aba' pemiker kita te jat. Kita patot ga' nrima' ukom Tuhan Allah, upa meda' urang dunia to'. ⁴Uleh lampar besai pengaseh Tuhan Allah aba' Ya ma mah kaseh ke kita. ⁵Nya' nyuroh Ya mre' idop baru aba' Al Maseh tangan kita mati tegal kebala penyalah kita. Tegal pemayek Ya ga' kita' daslambat. ⁶Tuhan Allah ngidop kita ari pemat i sama upa meda' Ya ngidop Isa Al Maseh. Ya nepo' kita aba' Isa de sruga. Uga' nya' Ya pulah nema kita nyau sute' aba' Isa. ⁷Tuhan Allah mulah piya' isa' jemah lah ensia meda' lampar besai pemayek ati Ya te nise' taneng. Pemayek ati Ya nya' deanya' Ya pas Isa Al Maseh mulah te bayek ke kita. ⁸Tuhan Allah nyelamat kita' nema pemayek ati Ya, ngau cara kita' pecaya' ke Ya, ukai tegal apa te kita' pulah. Kita' tau' daslambat to' pemre' Tuhan Allah. ⁹Nya' ukai asel kreja kita', keba' nang adai urang te ngepah ngemah dire'. ¹⁰Tuhan Allah udah mulah idop kita baru. Kita tau' piya' nema kita sute' aba' Isa Al Maseh keba' nya' Tuhan Allah ka' kita mulah kebala utai te bayek te udah deamo' Ya ari meliya'.

Isa Al Maseh nyute' bansa Yahudi aba' bansa bukai

¹¹Kebala menyade' ku te ukai ari bansa Yahudi. Ingat ke pengidop kita' meliya' teh. Kita' dasebot bansa te nadai dasunat, uleh sida' Yahudi

ngako' dire' bansa te dasumat. Sunat to' kelai' te adai de tuboh ensia aba' to' dapulah uleh ensia. ¹²Meliya' teh kita' nadai sute' aba' Isa Al Maseh, kita' to' bansa aseng te nadai masok urang te dapileh Tuhan Allah. Kita' dulau nise' hak buleh apa te udah dedanyi Tuhan Allah ke bansa Yahudi. Kita' idop alam dunia to' nise' agam aba' nadai nglala Tuhan Allah. ¹³Uleh ento' nema kita' nyau sute' aba' Isa Al Maseh, kita' te jaoh meliya' ento' nyau semak tegal darah Al Maseh. ¹⁴Al Maseh mah te nyuroh kita tau' idop damai, Ya te udah nyute' bansa Yahudi aba' bansa bukai. Pelaya' kita upa meda' dineng te tebal daruboh Isa. ¹⁵Isa nyerah idop dire'. Ngau cara nya' Ya ngapos prator agama Yahudi aba' uga' kebala perintah te diya'. Tegal nya' ga' dua klumpok bansa te bebida jadi sute' aba' tau' idop alam damai nema Isa te udah nyute' sida'. ¹⁶Tegal Ya mati de kayu saleb, Al Maseh udah ngemado' pelaya' bansa Yahudi aba' bansa bukai. Aba' Ya te udah nyute' kita' ngenamai kita' aba' Tuhan Allah. ¹⁷Isa datai madah Brita Bayek tentang damai ke kita' te ukai bansa Yahudi, te jaoh ari Tuhan Allah. Aba' Ya madah ga' Brita nya' ke kami bansa Yahudi te semak aba' Tuhan Allah.* ¹⁸Uga' kita, bayek sida' Yahudi bayek urang ari bansa bukai, ari Al Maseh mah kita tau' datai ngadap Apai kita nema Roh Kudus nalau uga' kita. ¹⁹Keba' nya' kita' nadai age' urang aseng aba' penatai. Uleh ento' kita' nyau jadi sute' aba' urang te daempu Tuhan Allah aba' nyau sebilek aba' Tuhan Allah. ²⁰Uga' kita to' kebarat rumah te dadiri Tuhan Allah. Kebala rasol aba' nabi upa meda' dasar rumah nya', aba' Isa Al Maseh upa meda' tiang te nyuroh rumah nya' tegoh. ²¹Kita udah sute' aba' Isa Al Maseh. Nya' te nyuroh kita datipan Ya ngau bayek aba' detangker jadi rumah Tuhan Allah te besai te kusus ngau Ya. ²²Tuhan Allah niri uga' kita ngau rumah teban Roh Ya diyau nema kita sute' aba' Isa Al Maseh.

Paulos nusoi Brita Bayek ke urang te ukai bansa Yahudi

3 Nya' nyuroh ku to' Paulos dapenyara nema ku nusoi Isa Al Maseh ke kita' urang te ukai bansa Yahudi. ²Kita' pesti udah ninga, tugas te dapecaya' Tuhan Allah ke ku, isa' ku madah pemayek ati Ya ke kita'. ³Tuhan Allah kusus nganya' ke ku apa te udah Ya tapok ari urang upa meda' te udah ku tules ke tade'. ⁴Ente' kita' maca apa te ku tules, kita' tau' bada' Tuhan Allah te nyuroh ku nyarok tentang Al Maseh te slama'

* 2:17 Yes. 57:19

to' Ya tapok ari urang. ⁵Meliya' teh te detapok nya' nadai kala' depadah ke urang, uleh ento' Roh Kudus udah nganya' ke kebala rasol aba' nabi te dapileh Ya. ⁶Te detapok nya' upa pito': Tegal pecaya' ke Brita Bayek nya', bansa bukai ngasa berkat te dulau teh pro' deageh ke bangsa Yahudi, aba' bansa bukai sama aba' bansa Yahudi jadi anggota tuboh Al Maseh aba' sama nrima' apa te udah dedanyi Tuhan Allah nema empu Isa Al Maseh. ⁷Tegal kuasa aba' pemayek ati Tuhan Allah, ku tau' jadi playan Ya aba' madah Brita Bayek Ya. ⁸Ari entara uga' urang te daempu Tuhan Allah ku mah urang te paleng met. Uleh Tuhan Allah udah nganya' pemayek ati Ya ke ku. Ya ngutos ku ke urang te ukai bansa Yahudi madah lampar besai berkat ari Isa Al Maseh. ⁹Aba' ku datugas Allah nyelas ke uga' urang kati Ya nemo' pengamo' te detapok Ya meliya'. Ya mah te mulah langet aba' bumi. ¹⁰Maksud Tuhan Allah, ento' ari jemat kebala mlikat aba' kebala penguasa de sruga meda' lampar besai pemanai Tuhan Allah alam brena utai. ¹¹Tuhan Allah mulah uga' nya' nuna' te udah deamo' Ya ari semaru. Utai nya' tejadi nema apa te udah dapulah Isa Al Maseh, Tuhan kita. ¹²Kita sute' aba' Al Maseh aba' pecaya' ke Ya, nya' nyuroh kita nadai takot nyemak Tuhan Allah nema yaken kita datrima'. ¹³Keba' nya' ku minta' ke kita' nang putus asa meda' ku ma pedeh tegal nusoi Brita Bayek ke kita'. Pemedeh ku tuna' des alah nyuroh kita' gaga nema ngau cara nya' Tuhan Allah ninge' kita'.

Pradua Paulos

¹⁴Nya' te nyuroh ku nyungkon nyemah bradua de mua Apai kita. ¹⁵Ya mah te mre' pengidop ke uga' te diyau de sruga aba' de bumi. ¹⁶Ku bradua engkrema' Tuhan Allah nalau kita' ngau kebala berkat te lampar besai, isa' Roh Kudus nguat ati kita'. ¹⁷Aba' ku bradua isa' Isa Al Maseh diyau alam ati kita' nema kita' pecaya' ke Ya. Aba' ku bradua isa' kaseh nyuroh kita' tegoh upa meda' pon kayu te akar ya dalam, aba' upa rumah te dapulah ngau dasar te tegoh. ¹⁸Aba' ku bradua isa' kita' aba' uga' urang te daempu Tuhan Allah nyarok lampar luh, panyai, tinge' aba' dalam kaseh Al Maseh nya'. ¹⁹Ku bradua isa' kita' ngasa kaseh Ya te ma jaoh de luar pemiker kita, isa' kita' dapenoh ngau sipat Tuhan Allah. ²⁰Puji Tuhan Allah te bekuasa lebeh ari talah mulah kebala uga' utai te kita pinta' aba' piker, ngau kuasa Ya te kreja alam ati kita. ²¹Tuhan Allah mah te patot

dapuji turon-menuron belama raya alam jemat nema kita sute' aba' Isa Al Maseh. Amen.

Sute' alam Tuhan

4 Keba' nya', ku urang te tangan de penyara tegal ngelayan Tuhan Isa, minta' isa' kita' idop patot nema kita' udah dakumai Tuhan Allah. ²Kita' alah renah ati, alah lulot aba' uga' urang, aba' alah sabar. Anya' ke kaseh kita' ke sama dire' ngau cara sabar nrima' pangan bukai. ³Brusaha bamat-amat kah kita idop damai nema kita udah dasute' Roh Kudus. ⁴Pro' adai sute' tuboh aba' sute' Roh, upa piya' ga' Tuhan Allah ngumai kita ngagam utai te sama. ⁵Pro' adai siko' Tuhan, sute' iman aba' sute' pane'. ⁶Pro' adai siko' Tuhan Allah aba' Apai uga' urang. Ya te mrintah uga' utai, Ya nyuroh uga' utai mulah apa te dakedeka' Ya, aba' Ya diyau de uga' urang. ⁷Uleh Isa Al Maseh udah mre' krunia Ya ke kita nuna' te dakedeka' Ya. ⁸Keba' nya' adai datules alam Kitab Suci upa pito':

“Ya udah nike' ke teban te tinge'. Ya ngemalu kebala urang te ngemunsoh Ya ngau cara maksa sida' nrudi belakang Ya. Baro' urang te mihak ke Ya, dabre' Ya kebala pemre'.”*

⁹Piya' ni ente' depadah, “Ya udah nike',” breti Ya ga' te udah turon ke bumi te paleng dalam? ¹⁰Ya te udah turon, Ya nya' mah ga' te udah nike' ke langet te paleng tinge' isa' de uga' utai adai Ya. ¹¹Aba' Ya kedire' mah te udah mileh urang jadi kebala rasol, kebala nabi, kebala penginyel, kebala gemala aba' pengajar jemat. ¹²Ya mre' krunia ke sida', isa' sida' nyiap urang te daempu Tuhan Allah ngelayan Tuhan Allah aba' nguat tuboh Al Maseh, ¹³datai ke senta uga' kita seiman, sute' pemenau' tentang Anak Tuhan Allah, aba' uga' kita betamah tuwai pemiker, datai ke kita sama upa meda' Al Maseh te empu kebala sipat te bayek. ¹⁴Keba' nya' kita nadai age' upa miyak. Kita nadai age' upa prau mudah deguncang kiya'-kito'. Kita nadai mudah te bai'-bai' kebala pengajar baru te salah aba' pengajar te nipu te nesat kita. ¹⁵Uleh kita alah idop nuna' te kena' bluma' kaseh ke pangan aba' tumoh upa Al Maseh te jadi pala' jemat. ¹⁶Ya mah te nyuroh uga' tuboh tesuson bayek aba' detamet sute'. Ente' uga' anggota tuboh bekreja nuna' tugas dire' aba' ngaseh anggota bukai, uga' tuboh nya' ka' betumoh aba' nguat anggota bukai.

* 4:8 Mas. 68:19

Cara idop baru te kena'

¹⁷ Keba' nya' de mua Tuhan ku ngingat to' ke kita': Nang kita' idop upa urang te nadai nglala Tuhan Allah ngau pemiker te nise' reti. ¹⁸ Pemiker sida' petang, aba' sida' jaoh ari idop te Tuhan Allah ka' bre' ke sida'. Utai nya' tau' piya' nema tegal pemudu aba' penegel ati sida'. ¹⁹ Sida' nyau nise' mua malu. Nya' nyuroh sida' slareh ka' mulah te jat, nuna' peneka' ati dire'. ²⁰ Uleh te kita' pelajar ke ari Al Maseh nadai upa piya'. ²¹ Nema kita' udah ninga tentang Isa aba' nrima' pengajar te kena' te brasal ari Ya. ²² Keba' nya' dudi kah cara idop te lama' nema nya' ngemudu kita', aba' peneka' idop te upa piya' ngerusak kita'. ²³ Kita' alah nyadi Tuhan Allah male' ati aba' pemiker kita'. ²⁴ Kita' nuna' cara idop te baru, nema Tuhan Allah udah male' kita' upa sipat Ya isa' kita' bamat-amat kena' aba' kudos. ²⁵ Keba' nya' kebala menyade' nang age' kita' ngemula'. Jujor ke kita' aba' urang bukai, nema kita' to' sama anggota tuboh Al Maseh. ²⁶ Ente' kita' ranseng ke urang, nang sampai nya' nyuroh kita' dusa. * Nang kita' ranseng datai ke mataari padam. ²⁷ Nema ente' kita' ranseng sengabot kita' mre' kesempatan ke Ibles kepala' bala siten ngalah kita'. ²⁸ Urang te gah encuri, nang encuri age', sida' alah bamat-amat brunte' kreja nguleh duet ngau cara te bayek isa' duet te dengau sida' ari-ari bayah aba' isa' sida' tau' ga' mre' ke urang te nise'. ²⁹ Nang kita' becakap ke utai te medeh ati pangan. Uleh cakap ke utai te beguna te nguat ati. Cakap te upa nya' jadi berkat ngau urang te ninga kita'. ³⁰ Nang sampai idop kita' nyuroh Roh Kudus riyu, nema Roh kudos te adai alam kita' nya' kelai' ente' kita' to' empu Tuhan Allah, aba' jemah lah de ari te udah deatoh, Ya pesti bamat-amat ngelepas ari dunia te petang to'. ³¹ Jadi kita' pedeh ati, garang, aba' ranseng ke urang. Jadi kita' blaya' aba' uga' urang, jadi mejai' pangan aba' jadi mulah kebala utai te jat. ³² Kita' alah bayek ati aba' kaseh ke pangan. Kita' alah ngampon urang bukai, upa meda' Tuhan Allah ngampon kita' nema kita' sute' aba' Al Maseh.

Idop alam trang

5 Kita' to' kebala anak Tuhan Allah te dakaseh, keba' nya' kita' alah nuna' apa te dapulah Tuhan Allah. ² Kita' alah idop alam kaseh ke

* 4:26 Mas. 4:5

pangan bukai, upa meda' Isa Al Maseh udah ngaseh kita' aba' udah nyerah dire' mati nebos dusa kita. Apa te udah dapulah Ya nya' jadi pesemah te bau nyamai de mua Tuhan Allah.* ³ Keba' nang kita' kanyi aba' nang kita' mulah utai te nadai senunoh aba' nang tama'. Nang sampai kita' jadi buah cakap urang nema kita' to' urang te daempu Tuhan Allah. ⁴ Aba' nang ga' kita' cabol mulot aba' becakap ke utai te nise' reti, nema utai nya' nadai patot kita' cakap. Uleh kita' alah slareh besukor ke Tuhan Allah nema apa te udah Ya pulah. ⁵ Kita' alah tau' bada', kebala urang te kanyi, urang te mulah utai te nadai senunoh aba' urang te tama' nya' sama mah aba' urang te nyemah berhalu. Sida' nise' jatah de alam Pemrintah Isa Al Maseh aba' Tuhan Allah. ⁶ Nang kita' semengkau' datesat kebala cakap urang te bula' tentang kebala dusa nya' tade', nema kebala dusa nya' nyuroh Tuhan Allah ranseng ke kebala urang te nadai patoh ke Ya. ⁷ Keba' nya' nang kita' bekawan aba' sida'. ⁸ Meliya' teh amat mah kita' idop de teban te petang, uleh ento' kita' nyau de teban te tampak nema kita' udah daempu Tuhan. Keba' nya' kita' alah idop upa urang te idop de teban te tampak. ⁹ Nema urang te idop de teban te tampak tau' mulah uga' kebala utai te bayek, te adel aba' kena' de mua Tuhan Allah. ¹⁰ Brusaha ke kita' ngiga' aba' nuna' apa te nyuroh Tuhan Allah gaga. ¹¹ Nang kita' mulah kebala utai te nise' reti te gah dapulah kebala urang te idop de teban te petang. Uleh kita' alah madah ke sida' ente' kebala utai te sida' pulah ke nya' salah. ¹² Nyebot gena ja' te udah dapulah sida' de teban te petang, nya' udah nyuroh malu. ¹³ Ente' trang nya' nyuroh kebala utai peda', uga' te deanya' nya' tampak amat. ¹⁴ Nya' nyuroh adai urang madah:

“Dani ke meh te tangan tinok,
 aba' bangket ke meh ari pemati!
 Al Maseh ka' nerang meh.”

¹⁵ Keba' nya' prati ke bamat cara kita' idop. Nang kita' idop upa urang te budu, uleh kita' alah idop upa urang te panai. ¹⁶ Aba' ngenap adai kesempatan pulah ke te bayek, nema jaman to' penoh pemenyat. ¹⁷ Keba' nya' nang kita' budu; brusaha kah kita' isa' nyarok te dakedeka' Tuhan Allah. ¹⁸ Aba' nang kita' mabok ai' angor nema mabok ai' angor to' nyuroh ngerugi dire' aba' ngerugi pangan bukai, uleh kita' alah penoh Roh Kudus. ¹⁹ Kuat ke pangan bukai ngau apa te de tules alam masmur aba' kebala lagu rohani. Menanyi, puji ke Tuhan Allah ngau ati gaga. ²⁰ Alam brena

* 5:2 Kel. 29:18

utai kita' alah slareh besukor ke Tuhan Allah Apai kita alam nama Tuhan kita Isa Al Maseh. ²¹ Kita' alah sama ka' ninga pangan bukai nema kita' hormat ke Al Maseh.

Laki bini

²² O kebala bini, kita' alah ka' ninga laki kita' upa meda' kita' ka' ninga Tuhan, ²³ nema laki to' pala' bini sama upa meda' Al Maseh pala' jemat. Ya mah te udah nyelamat jemat, tuboh Ya kedire'. ²⁴ Sama upa meda' jemat ka' ninga Al Maseh piya' ga' kebala bini alah ka' ninga laki sida' alam brena utai.

²⁵ O kebala laki, kaseh ke bini kita' upa meda' Al Maseh udah ngaseh jemat aba' udah nyerah idop Ya isa' jemat daslamat. ²⁶ Al Maseh nyerah dire' mati isa' jemat Ya kudus. Ya mreseh jemat ngau Brita Bayek aba' ngau ai'. ²⁷ Ngau cara nya' Al Maseh mulah jemat bedawar datai de mua Ya. Jemat bamat-amat breseh nise' kurang aba' penyalah sama skale'. ²⁸ Upa piya' ga' laki alah kaseh ke bini upa meda' ngaseh tuboh dire'. Urang te kaseh ke bini dire' brete ya ngaseh dire'. ²⁹ Nema nadai kala' urang areh ke tuboh dire', uleh sida' ngintu tuboh dire' upa meda' Al Maseh ngintu jemat Ya. ³⁰ Kita daintu Ya nema kita to' anggota tuboh Ya. ³¹ Keba' nya' adai datules upa pito', "Urang laki ka' nudi apai aba' inai ya aba' sute' aba' bini ya, keba' sniko' jadi sute' tuboh."* ³² Reti apa te udah ku padah ke to', ma mah dalam. Uleh apa te udah ku padah kah nya' tentang hubungan Isa Al Maseh aba' jemat Ya. ³³ Uleh amat piya' tetap mah kebala urang laki alah kaseh ke bini dire' upa meda' ngaseh dire' ke dire'. Aba' bini alah hormat ke laki dire'.

Anak aba' apai inai

6 O kebala anak, patoh ke apai inai kita' nuna' te dakedeka' Tuhan Allah nema nya' mah te alah kita' puluh. ² "Hormat ke apai inai kita'." To' perintah Tuhan Allah te semaru adai danyi. Ente' kita' nuna' perintah Ya nya', ³ idop kita' nyamai aba' umur kita' panyai de dunia to'.*

⁴ Aba' kebala apai, nang kita' becakap aba' mulah utai te nyuroh anak kita' ranseng, uleh intu aba' didek ke sida' nuna' apa te jako' Tuhan Allah.

* 5:31 Kej. 2:24 * 6:3 Ul. 5:16

Ulon aba' tuan

⁵O kebala kita' te jadi ulon, patoh ke printah tuan kita' de dunia to' ngau hormat. Pulah ke uga' nya' ngau ati te tulos, sama upa meda' kita' patoh ke Al Maseh. ⁶Nang pro' de mua urang bayah ka' nyuroh ati ensia gaga, uleh pulah ke uga' nya' ngenap ati nema kita' ulon Al Maseh te nuna' peneka' Ya. ⁷Kreja ke tugas kita' ngau ati gaga, aba' layan ke tuan kita' upa meda' kita' ngelayan Tuhan Isa. ⁸Dinga kah, ngenap urang bayek ulon bayek te ukai ulon, ente' sida' udah mulah utai te bayek jemah lah Tuhan Allah ka' malas ke sida'.

⁹Aba' kebala tuan, pulah ke te upa nya' ke kebala ulon kita'. Nang kita ngancam sida' nema kita' tau' bada' Tuhan kita' Tuhan sida' ga'. Tuhan to' adai de surga aba' Ya nadai nyemeh mipeh urang.

Cara ngelawan Ibles Kepala' bala sitan

¹⁰Pesau ku te pemado' to', kuat ke ati kita' ngau kuasa Tuhan te lampar besai, ngau cara kita' sute' aba' Ya. ¹¹Ngau ke uga' alat prang te dabre' Tuhan Allah ke kita' isa' kita' talah ngelawan tipu Ibles Kepala' bala sitan. ¹²Nema kita bejuang to' ukai ngelawan ensia, uleh ngelawan brena macam roh te mrintah, kebala penguasa de dunia te petang to' aba' kebala sitan de udara. ¹³Keba' nya' ngau ke uga' alat prang Tuhan Allah, isa' kita' talah ngelawan munsoh de senta ari te jat datai aba' kita' kuat datai ke pemado'. ¹⁴Tegoh kah kita' diri. Pegai kah pengajar te kena' ari Tuhan Allah. Nema pengajar te kena' nya' kebarat ke sementeng te nyuroh kita' slareh siap. Pegai kah idop kena' nema idop kena' nya' kebarat ke baju besi te ka' ngelinong kita'. ¹⁵Kita' alah slareh siap madah Brita Bayek tentang damai, nema slareh siap nya' kebarat ke sepatu te dengau kita'. ¹⁶Alam brena utai kita' alah slareh beiman, nema iman nya' kebarat prisai te tau' madam uga' panah api Ibles Kepala' bala sitan. ¹⁷Aba' yaken kah kita' Tuhan Allah udah nyelamat kita', nema slamat ari Tuhan Allah nya' kebarat tupi prang te ngelinong pala' kita'. Aba' pegai ke te jako' Tuhan Allah upa meda' megai pedang nema te jako' Ya adai penguat ari Roh Kudus. ¹⁸Pulah ke uga' nya' bluma' bradua minta' tulong ari Allah. Ngenap kale' kita' bradua, bradua ke nuna' apa te Roh Kudus pimpen ke kita'. Kita' alah slareh siap bradua ke uga' jemat Tuhan Allah, nang sampai lejo'. ¹⁹Nang kelupa ga' bradua ke ku, isa' ngenap kale' ku becakup Tuhan

Allah mre' kata-kata te pas ke ku aba' isa' ku brani madah Brita Bayek te meliya' detapok Tuhan Allah ari urang. ²⁰Ku dautos Al Maseh madah Brita Bayek, aba' tegal nya' mah ento' ku de penyara. Bradua ke ku isa' ku brani becakup ke Brita Bayek nuna' te datugas ke ku.

Pesau te pemado'

²¹Tikikos ka' nusoi pengidop ku ke kita', isa' kita' tau' bada' kati rita ku. Tikikos to' menyade' kita te kita kaseh aba' ya setia ngelayan Tuhan. ²²Ya ku utos ke kita' isa' kita' ninga lansong ari ya kati rita kami isa' kita' nadai puas ngagam kami. ²³Ku bradua engkrema' Tuhan Allah Apai kita aba' Tuhan Isa Al Maseh mre' idop penoh damai aba' kaseh ke pangan aba' kita' slareh percaya' ke Al Maseh. ²⁴Ku bradua isa' Tuhan Allah nganya' pemahek ati Ya ke kita' te slareh ngaseh Tuhan kita Isa Al Maseh.